

萬有文庫

第二集七百七種

王雲五主編

洪北江詩文集

(四)

洪亮吉撰

商務印書館發行

集文詩江北洪

(四)

撰吉亮洪

書叢本基學國

學使北江先生少孤。其克自樹立。及學之有成。實稟賢母蔣太夫人之教。故其編詩也。以及侍太夫人所作者。爲附鮎軒集八卷。漢書地理志。會稽鄞縣有鮎崎亭。南越志。巢鮎長寸餘。大者長二三寸。腹中有蟹子如榆莢。合體共生。俱爲鮎取食。郭璞江賦。所謂璫蛭腹蟹是也。先生十歲始就外傳。二十卽出授徒。負米所至。皆不越五百里外。一歲必兩歸。以慰太夫人。與莢蟹之早出暮入相類。及奉太夫人諱。讀禮於閭門者二年。繼又饑驅四方十年。乃獲升上第。官禁林逾一歲。卽持節視學黔中。人欣先生之遇。而不知先生以祿不逮養。每與人言之。輒泣下不止。爾雅。卷施草拔心不死。先生之名集。蓋以此乎。卷施集。自己亥至癸丑。已得十四卷。門下之士。乞刊之于黔中。遠覽在里門日。卽受先生之知。今又從官牂柯。先生之所以待遠覽者。未嘗以屬吏視之也。今遠覽行以老乞休矣。先生門下士。以遠覽知先生尙深。乞爲序刊詩歲月。因卽遠覽之所以知先生者序之。至詩之工拙。世之知先生者甚多。非遠覽之所敢及也。時乾隆五十九年。歲在甲寅。新正十日。鎮遠縣知縣署黎平府下江通判河南張遠覽謹序。

卷一

備書東觀集 古今體詩九十二首

卷二

憑軾西行集 古今體詩五十四首

卷三

仙館聯吟集 古今體詩七十八首

卷四

官閣圍爐集 古今體詩三十三首

卷五

太華凌門集 古今體詩三十八首

卷六

中條太行集 古今體詩八十二首

卷七

緱山少室集 古今體詩一百二十一首

卷八

靈巖天筑集 古今體詩一百三首

卷九

西苑祝釐集 古今體詩七十九首

卷十

祕閣研經集 古今體詩八十二首

卷十一

五經聯騎集 古今體詩五十三首

卷十二

黔中持節集 古今體詩一百三十六首

卷十三

黔中持節集 古今體詩一百四十六首

卷十四

黔中持節集 古今體詩八十六首

卷十五

關嶺衝寒集 古今體詩九十首

卷十六

蓮臺消暑集 古今體詩八十首

卷十七

回舟百嶠集 古今體詩一百十三首

卷十八

侍學三天集 古今體詩一百四十八首

卷十九

全家南下集 古今體詩一百十八首

卷二十

單車北上集 古今體詩一百四十四首

卷施閣詩卷第一

儲書東觀集己亥庚子

句容別朱三潞時朱居憂抱疾幾殆閱而贈之

一心願汝作頑石我歸來兮石不泐

高郵金秀才蘭以戊戌十月與亮吉訂交越月來會母葬事畢將反同人集味辛齋作詩送之并索亮吉詩謹賦此首

死生離別杳難支復向城西餞素知窮歲冰霜行未定高原風木泣多時君因作贅悲身計我愧論交有鬢絲夢折素梅聊贈遠孤篷才發已相思

清明後一日與孫大攜酒飲王七秀才廷俞南圃歸過縣門憶亡友林嗣基作

晚唸朝咏寄蕭騷王七園前一樹桃接翼水禽窺綠鬢連枝風蕊墮青袍君從愁裏何妨醉我覺塵中尙可豪歸路忽驚官閣過又教鉛淚滴城壕

勞勞身計本無涯生儻多愁死亦佳閱世短于欵枕夢招魂長入酒人懷琴書風捲知誰在花月尊空與願乖欲把閒蹤比飛絮年年開落縣南街

揚州別汪大端光

木葉暗天地。雨聲連曉昏。吾行數千里。別子舊東門。家在依鄉黨。親亡憶弟舅。猶餘尼父歎。三至席難溫。
渡河寄孫大星衍

春林綿綿雨聲接。紅白花飛雜黃葉。黃飄一葉忽入樓。樓上獨客生春愁。讀書先忘歲終始。瞥眼韶光已如此。同經憂患傷年少。太息前遊成隔世。荒墳三尺少婦棲。謂孫大喪婦吾家墓門雅亦啼。頻年禮俗斥凶服。

只有訪子還麻衣。麻衣不共蜉蝣死。失母尤愁對妻子。塗窮歌哭止從君。百里遙遙共江水。君家大母顏色溫。一載撫我如撫孫。華陽席中多友朋。屬爾作弟吾爲舅。窮冬風雪記出門。遠遣瘦魄隨饑魂。三條銀

燭共校文。暇揖沮頡談巴羣。吾儕作客尤狂放。哭母傷妻一堂上。丈人知我自不憎。謂劉雲房先生同輩相看訝

無狀。言狂寧失座上歡。性分屈曲非能堪。錢刀生計亦偶爾。我輩于分難饑寒。層紅疊翠江南地。草草狂

歌人亦忌。插架奇書送爾歸。連床別夢勞予記。鳩今喚侶我別家。挂席百里隨風雅。平生性命視知己。得

一死友殊堪誇。此時憶君顏不華。醉裏擾擾人聲譁。遙程豈止無一花。青草路斷飛黃沙。

高郵哭亡友賈田祖

城角參差暮雨昏。水程何處弔騷魂。吟狂陋巷三間屋。骨冷高原尺五墳。遺業尙存通德里。舊交真軼古

夷門。囊錢斗酒江南路。他日相期報慫孫。丙申夏予留滯太平。幾不能行。先生假錢攜酒送歸。

握別盟言未敢寒。重泉書去杳漫漫。承家久已傷羊舌。論史何應食馬肝。公子才名終不達。故人歌哭總無端。霽昏蠹蝕三千字。忍向燈前掩淚看。

夜行宿遷道中

荒原真厭馬行遲。不定陰晴四月時。破澗怒雷分雨勢。斷厓高樹表風枝。無家已絕經年夢。有約先懸出世思。他日故巢相憶處。好尋芳草寄卷施。

邳州城外

十里涼雲拂柳絲。野花香破酒醒時。征衫幾日塵沙黦。怕向谿頭看鷺鷥。偶成

荒塗百里夜程輕。破暝重從石磧行。天闊露寒人不見。忽驚邨外雨絲明。

過永濟橋

塗長客意勞。持火出層壕。小市人聲亂。危橋馬影高。岸風清薄酒。林露滴垂桃。晨氣還成雨。微寒入紵袍。曉行

邨雞喔喔酒全傾。擁被求衣事曉行。四野月明迷向背。一山雲出定陰晴。春殘苦乏加餐信。道遠愁非負米程。醉醒十年前事起。馬頭塵夢較淒清。

過蕭望之故里

西京獄吏皆丞相。東海蕭生偶抱關。讀罷辭碑無一事。支頤還望馬陵山。經術崇隆位望危。元成太傅總奇才。彭宣枉自稱方正。不及朱游和藥來。

滕文公廟

商鞅立新法。大啓陌與阡。子居謀王道。更欲建井田。強秦以滅秦。二世社以遷。滕亡祀則存。廟食普萬年。我來謁荒祠。悼歎小國君。遺像一畝宮。五十里致虔。霸術豈足矜。謀國須大賢。

四鼓行嶧縣道中

高原墳樹古。人鬼或同經。夜氣沉殘月。天風動大星。未愁前路暗。不斷此山青。向曉寒尤勁。車前雨腳腥。謁孟廟

落落非無志。囂囂亦有承。吾猶距楊墨。真不遠齊滕。小邑衣冠肅。崇祠俎豆增。摩挲讀碑字。應愧歷階升。憶賃東西廡。曾傳內外篇。承師北堂上。勤學斷機前。幼賤同尼父。親喪愧少連。寢筵虔拜謁。心折爲三遷。客舍

紙屋繩床擁敗衾。鳴雞聲裏慘晨陰。星離雨絕書難達。山亂雲荒夢欲沉。香覓反魂勞曼倩。草尋益母泣曾參。應憐孤露餘生費。無復髫年入世心。

東阿謁西楚霸王墓

松柏曾無半畝宮。蒿萊時起憤王風。學書我亦慚無就。刻劍君應恨未窮。十載通侯酬項伯。千秋大義戮丁公。猶餘一事逃清議。賣友誰誅呂馬童。

滋陽謁柳下惠墓

斷水鄰鄰樹色昏。行人駐馬揖空邨。孤羈我下無家淚。三黜誰招去國魂。偶食廟牲齊下邑。愁逢海鳥魯東門。傷心死士偏寥落。曉日樵蘇上冢屯。

五日客感

節物關心淚暗滋。斜陽原上泣多時。殘鷺驛路聲無緒。瘦馬崑山骨不支。五日花開憐客久。重泉家在恨歸遲。愁看弱弟同行役。相對昏鐙理鬢絲。

與黃大景仁話舊

壯志都從憂患移。別離如夢見猶疑。尋山蹤跡誰還健。戴斗文章爾獨奇。塵海此時容小住。書倉終日坐長饑。朝來欲上燕臺望。好覓天街瘦馬騎。十五年前將母身。同攜襖被出城闔。緣知來日非今日。已覺吾親卽若親。晚歲互看謀粟米。衰齡密共禱星辰。登堂此度先垂涕。我已傷心作鮮民。

備書

備書生計尙淹留。并疊吟懷事校讎。獨鶴見人殊惘惘。餓鳥得樹亦啾啾。雲和草色荒三徑。月與花光豔一樓。却厭軟紅塵裏逐。放教愁坐轉忘愁。

小病

佳時曾少出遊車。側屋三椽此寄居。失喜遠書來酒後。時得季仇書卻憐新病入秋初。名花作果香偏異。野鶴隨人性亦疎。拋得世緣耽學靜。鬢絲一月未經梳。

得孫大江寧書却寄

櫻桃一樹傍紅牆。書到翻憐客異鄉。酒癖更沾衣袂溼。花疎時入枕函香。刪除好夢緣妨睡。檢點閒身未肯狂。我欲悟君先學道。攜編三月坐匡牀。

憶汪大端光

淮南冀北經千里。除却孫郎便憶君。小別正當春後雨。封書欲寄隴頭雲。人輕詞客張三影。天與揚州月二分。珍重綺年題綺句。莫教前輩擅清芬。

夢入外家南樓覺後有感寄內弟阿魁阿愚四首

樓頭殘燭迴淒清。樓下愁人怨曉明。千里斷虹隨夢遠。五更零葉打衣輕。風鴉巢樹知前後。竹馬鄰童識

姓名若把舊時情緒譜。杏花樓上是三生。
兩家兄弟王成行。十五華年逐隊忙。作達最憐羣上樹。學趨猶見汝扶牀。鐙明樓閣催書急。花入闌干壓
夢長。說與封奴渾未識。却教阿母倍淒涼。
梅蕊初飄杏復葩。商量春事已如麻。拜殘阿姊簾前月。看足鄰姬徑裏花。生少學愁愁未慣。孤眠遲夢夢
還賒。牆頭風細星辰定。不識何時轉歲華。
鞭絲爲客去恩恩。一事如今恨轉同。尺五蘼波輕燕艇。三層松閣紙鳶風。閒中草綠埋歌扇。愁裏花紅照
殯宮。十九年中衰盛異。欲從何處悟初終。

哭錢公子中銑

邗上孤篷竟未歸。絕憐愁魄斷斜暉。京華迢遞猶傳札。慈母殷勤尙寄衣。五日正沉江畔黍。一官虛憶省
中薇。魂消送我谿南日。苦說燕臺伴侶稀。
童年經術本無師。曾愧尙書國士知。死日尙聞憐趙壹。諸郎都解散袁滋。卅年宦達虛身計。五葉門衰賴
子持。莫愴筵前小兒女。更愁堂北鬢如絲。
七夕露坐憶孫大

瓜果筵虛薄露零。懶看河鼓說精靈。思君永夕空濛望。南斗光中第一星。

讀長慶集寄孫大

長慶集樂天自序。長微之七年。今亮吉春秋三十四。而季仇年纔二十七。與微之小于樂天同。二人之交。亦不減元白。所不逮者。或名位耳。其他尙可企及也。爰作一詩寄季仇。并邀同作。

偶讀開成少傅詩。七年我亦長微之。神仙共挂蓬萊籍。風月追吟楊柳枝。一代才名何必愧。九原交誼本堪師。江州司馬通州倅。料理頭銜似往時。

結交行寄孫大

浮雲變滅安足論。爾來友者洪與孫。九天仙人不嫌謫。一代交道殊能敦。君不見。結交不過通侯門。賤客雞狗無由分。結交不入春風場。少年鷹犬徒相妨。與其長安城中交俗儒。不若咸陽市上留博徒。俗儒言貌師中庸。緣飾經術爲三公。君無更齒馬東海。我尙恥說胡華容。博徒之交亦何有。長笑傾心在杯酒。一言席上吼雙龍。千古英雄困廣柳。我交黃子景仁。十七年病鶴雖病形疑仙。妻愁親老不思返。白日憔悴長安眠。趙生懷玉之交歲逾十。持論英英輩難及。洪生狷者不欲狂。知我只有眞州汪。端光壬冬岐路一握手。朗若壁月分輝光。驚濤飄蓬亦思止。自問心期只三子。江山花月久厭陳。乃貢清氣生茲人。非惟文藝擅儕輩。亦覺至性流眞淳。我交數子止可生。不若交子兼幽明。我交數子皆許身。不若許子兼心魂。三千里路夢飄忽。二百十字言溫存。前得江寧寄書。才二百十字。我廢我蒿篇。子悲蒙楚詩。中年哀樂亦如一。我若非爾。

形難支。自從五年來。會合一一數。茲離檢歷日。已過一百五。黃金臺下才士多。我不見爾還高歌。墮黃短趙屢相憶。要聽秉燭言如河。君不見。今人交道皆厭貧。不識古有范史雲。今人交道皆厭真。不識古有龔君賓。誰言刎頸交。我弔成安君。誰言投漆堅。我訪雷與陳。乃知天生爾。我爲交道。不獨文雄詩傑垂千春。華陽憶舊行。寄朱博士沛林海州光照汪縣丞蒼霖兼呈孫丈勳及令子星衍

異時我客華陽春。一方宰吏無俗人。汪丞治績亞林宰。更有博士真天民。吾鄉丈人亦軒特。鏡裏顏紅鬢斑白。四家僕從屢招人。一縣醇醪止供客。邑中賢者沈與王。亦設薄具邀吟狂。居留三月九十醉。餘者病酒眠匡牀。天然憂樂還相召。妖鳥鳴春已驚告。碧樹愁聞山鬼啼。縞章夢致谿神弔。城東一別事若麻。三載復看城中花。宰官擢守縣丞徙。博士貧老辭還家。當時我識三公子。兩抱妻憂一身死。乃知造物最忌狂。自悔吟顛亦應止。孫郎悟早雅興除。脫然樓上思著書。我來憔悴寡顏色。戒酒怕過山公廚。前遊歷歷春時節。欲著思量怕愁絕。鳥翅岡南宛轉簫。青元館裏昏黃月。人生年壽何須蓋。三十當令一生畢。已分琴書付鄭三。謂霞浦鄭聯華林君愛培受業于余者未應蹇放同王七。謂縣中秀才王廷龔春華已過憐秋曉。落落天空寄魚鳥。隔世形容照水愁。無家笠屐登山好。博士年衰屢致思。縣丞無息宦聲遲。一篇爲寄淮南守。慰爾風前哭子詩。

代書寄汪大端光八十韻

百慮不失一子才。爲世需。六經甫通三。我識愧里儒。才識工拙間。出處可不圖。子意乃不然。勸我入帝都。

爲言予有親。尙欲依菰蘆。子親存我亡。一請傷藐孤。負米十四年。裏空粟與芻。子行燕趙歸。勤作反哺。我成吳越遊。忽爲失母雛。我生慚世間。感子引作徒。爲傾橐中金。爲計道上儲。六百里水程。十八日旱塗。歷歷夷險郊。孰宿孰可鋪。英英公卿中。孰謁孰則毋。我足雖云劬。子口亦已瘡。感子珍重心。臨行野踟躕。譬若深谷風。幽草亦漸蘇。存亡心已傷。離別淚屢枯。萋萋四月花。莽莽長河蕪。挈弟旣慘淒。念友更咽鳴。相離第一程。夢子秦郵湖。涼月忽抱肩。老魚窺汀蒲。東阿縣西門。夢子又在吳。俱爲少年遊。鐙舫狂呼盧。三夢宣武坊。斜日殷銅鋪。新知無一人。知子應念吾。每夢必有淚。每淚必有書。書皆千百言。紙惡字跡麤。豈惟字跡麤。兼愧言辭紆。長安識君人。謗譽亦復俱。每苦立論嚴。憎子所服殊。我不置一辯。歸室始歎吁。欲摘天半星。爲子冠上珠。欲剪湘中霞。爲子身上襦。天河濯五色。色異凡紫朱。天衢曝衆文。文匪常羅繻。春月潤子顏。秋露濯子膚。日吐瑰麗辭。稱此珮服都。日陳琳球響。稱此顏色姝。留侯似婦人。曲逆美丈夫。不聞史傳譏。但覺流輩無。塵冠敝履中。不必德義孚。囚首垢面人。不必名實符。雖然願一言。少歲亦已徂。二十顏尙髫。三十頰有鬚。吾徒勤事業。棄置常所須。要當惜心神。何必營衣裾。急從良友箴。息此俗論誣。明年登玉堂。三館步復趨。貽茲老成規。莫被輕薄愚。我來人海中。戚戚意寡娛。因緣識文人。千百量以車。多文或爲史。小智僅作胥。行雖歷方州。見乃守坐隅。羣讜出詩編。朱墨盡貢諛。立語苦不工。已詡鮑謝逾。我時出直言。衆目怒以盱。謂我立論高。謂我制行迂。一心苟無慙。兀兀任毀譽。求子素識人。又各間一區。

非無楊生清。亦有黃子攏。旬日乃握手。餘皆掩蓬廬。時時讀子詩。消此慨與歔。子才信鷗鷺。我筆非於菟。頗愧紛疊來。索詩若索逋。我常思子言。氣斂不敢舒。逢子乃一發。筆禁口亦呼。子書亦易作。字錯墨屢塗。前聞欲移家。急札馳郵奴。煤車米石昂。詎可攜妻孥。況復堂上衰。行坐總欲扶。豈任舟車勞。與此食粒糲。詩儲潤書。及瘦方。本言皆悉錙銖。詎不爲子謀。使子烏就斂。子行試禮闈。先利矛與父。亦思賀萬錢。不若儲百壺。倘或成同官。雅足見發紆。拙效我亦收。令謨子先敷。壯往庶有程。少習藉可除。被酒一縱言。省札應豁如。

九月初二日得家書始奉適王氏姑七月初九日計翼日于崇南坊寓舍爲位以哭哀定并賦詩一章
吾祖憐嬌女。慈闈愛小姑。適王氏適年。舉一子。數日而殤。中歲卽從夫。憶嫂顏常瘦。思親淚屢枯。重泉真健羨。骨肉慶提扶。

八月二十日偕黃二暨舍弟飲天橋酒樓

長安百萬人中。有賤男子。日挾賣賦錢。來遊酒家市。昨日送君回。今日約君來。送君約君于此橋。長安酒人何寂寥。酒人無多聚還喜。破帽塵衫挈吾弟。攝衣上坐只三人。爽語寥寥落檐際。君言內熱需冷淘。我慣手冷應持螯。閒無一事且沉醉。不然辜負青天高。青天高高復飛雨。二十四櫺風欲舉。飛篷卷葉十里間。直視城南落驚羽。濃雲欲暗南郭門。斜日忽破千林昏。陰晴萬態鬪秋景。醒醉一夢恬吟魂。持千螯。揮